

Schwarz-Schilling: Potpisivanje Sporazuma o stabilizaciji i pridruživanju i ustavna reforma su prioriteti za nove bosanskohercegovačke vlasti



Ispunjenje uvjeta za potpisivanje Sporazuma o stabilizaciji i pridruživanju sa Evropskom unijom i provedba ustavne reforme trebali bi biti na vrhu liste prioriteta za nove vlasti Bosne i Hercegovine, rekao je danas u Sarajevu, na okruglom stolu u organizaciji njemačke Fondacije Konrad Adenauer, visoki predstavnik i specijalni predstavnik EU, Christian Schwarz-Schilling.

Gospodin Schwarz-Schilling je istakao da su reforma policije, reforma javnog radio-televizijskog sistema i bolja suradnja sa Međunarodnim krivičnim tribunalom za bivšu Jugoslaviju ključni preduvjeti za zaključivanje Sporazuma o stabilizaciji i pridruživanju sa Evropskom unijom.

“Željeli bismo, također, da dođe do napretka i u oblasti ustavne reforme, u smislu transformacije Daytonskog mirovnog sporazuma, čija je svrha bila da stavi tačku na rat, te da on postane jedan moderan, evropski ustav sa efikasnim mehanizmima odlučivanja, jasnom podjelom ovlasti između državnog nivoa i

nižih nivoa vlasti, te održivim sistemom zaštite ljudskih prava," rekao je.

U vezi sa planiranom tranzicijom OHR-a, gospodin Schwarz-Schilling je rekao da, bez obzira na to kakva će biti odluka o tačnom datumu ove tranzicije, novi Ured specijalnog predstavnika Evropske unije biće spreman pružiti pomoć domaćim bosanskohercegovačkim institucijama na putu ka Evropi.

"Međutim, jasno je da će dugoročna budućnost Bosne i Hercegovine u Evropi ovisiti o njenom Ustavu, koji treba da je u skladu sa evropskim standardima, koji su nepromjenjivi i koji se ne mogu prilagođavati Bosni i Hercegovini," rekao je.